

# OMUKUETU

N:o 11

NOVEMBER

1951



EHIJO LJOMOSHITUCI OSHINENE.

Jes. 25:6-10.

Naalenaale manga Kristus ine ja muujuni, omuprofeti Jesaja a tala nomeho gehunganeko ecimbo nd, o una Omuaa Jesus iigandjele oondjo duujuni nckuijambela meso. Omuprofeti a tala nkene elaka ljosihlonga she lja taandele kiiguana ajhe nokuhija aantu aalunde je je komushigakano ja mone omuenjo nelago. Omuprofeti okua n:ono komeho ge cndundu ja Sion jomu Jerusalem, nkoka kua ningua naale iituci iinene jokueta omajambo. Pokuma opo tuu mpoka pua ningua komeho oshituci oshinene shokujambela Onzigna ja Kalunga. Moshituci shoka mua zi omajambeko ogendji ga taandele kokulekule. Moohapu dika tatu kambadala okukonakona cshituci shoka oshikumici nomahijo n:oka Kalunga ta hija aantu nago, jo je je koshituci shoka.

Aantu taa peua shike moshituci shoka?

Tangotango ojo taa peua uujelele. Oshituci shoka itashi danua momilema. Oohapu doteksti tadi popi oshinima shika nokutja: „No ta tuula po onguo jesiikilo, kombanda jondundu ndjika, kui ja siikile aantu ajehe.” Omukeenakonashanakalunga a tsika. Oje kee luete oondjo de no kee luete esilohenda lja Kalunga. Omeho ge ga siikilua konguo jesiikilo. Ihe ku Golgata onguo ndjoka taji kucua po. Muujelele uomushigakano omukolokoshi a li pokusa, okua mono esilohenda ljokudimbulula oondjo de. Okua ti: „Otse tatu hepekua nokuli pajuuki, oshoka tatu peua shono tue shi ilonge.” Ihe oje kua dimbulula uo ohoole jOmukulili ndjoka je mu tsa omukumo okuigameka kuje okacimbo ke ka hugunina, a indile esilohenda, je e li taambe uo.

Pomushigakano natse uo tatu mono uujelele uupe. Opo tuu mpoka tu luete oondjo detu ngashika di li. Otatu dimbulula nkene natse uo tua dengica oondjo tue di ningi onina, di dengele oondungo miikaha iijapuki no moompadi oondjapuki da Kristus. Osho natse uo tua li mongundu ja mboka je mu aalele komushigakano. Ihe nohoole uo jOmukulili onenene kaji noongamba tatu ji dimbulula pomushigakano. Otashi tu fatulukile, Omuaa Jesus e hoole ndje, ongame tuu nguka nokua sile oondjo dandje.

Moshituci shoka shomuGolgata aajenda taa peua uo iikulja. Iikulja mbjoka ja kola, ji shi kukutica omuntu, onke ano taji jelekua mpaka noontumba domagadi. Iikulja mbika ja kola ojo ekulilo nuujuuki uomuKristus. Muukriste mu na iinima ojindji. Ohatu popi oshilonga sha Advente no sha Krismesa, nohatu popi esiku ljejumuko noPenteekeste, ihe oshinima oshinenene osho etendo etijaali ljomehempululo ljeitaalo tali popi Kristus noshilonga she shoku tu kulila. Otse ihatu lueta oku shi dimbua, ihe omacimbo omadigu gomokukalamuenjo kuetu, ompango sho taji tilica, neiuvo tali tu tamaneke neso tali tu tsuumbanda, katu mono ombili manga inashi tu fatulukila, Omuaa Jesus okua futu ongunga jetu ajihejihe sigo inaku hupa ue sha. Oje e tu geelelua. Kalunga okua hangana nOmuaana omoluetu. Omolua shoka itatu vulu okudima po ehangano ndjoka. Ekulilo ljomuKristus nuujuuki ue ouo iikulja ji shi kukoleka omunkundi noku mu pa oonkondo dokukondjica uulunde. Onkolui nge ta dimbulula, Kristus oje Omukulili gue, oje te eca iikolica, noshu uo omufuci ita jaka ue n. s. t. Ombinzi taji tu joolola mo muulunde. Otse tu hoole uulunde uetu, ihe oohole ja Kristus oku tu hoola sigo okusa nge taji minikile uulunde mboka, ouo tapu tameke oku tu kungica.

Moshituci mu na uo enjanju. Oljo<sup>3</sup>tuu ndjoka omuprofeti e li diladila sho kua popi „omavinu ga dindololua.” Omutenge sho gu li po omudigu, noontongo doondjo sho tadi hepeke omuenjo, nenge omuntu sho ta dimbulula nkene okuigandja kue ku Kalunga okuo okuombinga jouala, oje a soluhodi nokuiekelela. Ihe uujelele uomushigakano sho tau minikile nomuntu ta dimbulula Omuaa Jesus oje Omukulili, opo tuu mpoka omutenge tagu gu po nomuenjo tagu mangu-luka kiimpuju nokuuda enjanju ljuhupico. Omuiambi te li hokolola, oje sho kua mono ombili konima jolugodi oludigu:

„Omuenjo kagu eca kuligole! Omuaa.

Gua li gua sil' omutenge no gue gu kucilua.

Nda jaala naale efudico, inali monika.

Nda peua ih' ekucilo ku Jesus nonda pua.”

Moohapu doka mu na enjanju lja shili.

Oolje taa hijua moshituci shoka?

Oteksti jetu taji jamukula: „Jehova, Omue ne guoongundu daakuiita ota hangele aantu ajehe oshituci.” Oshinima osho tuu shika Omuaa Jesus muene okue shi tumbula sho kua ti: „Osho Kalunga kua li e hoole nuujuni oje a gandja Epona lje,” no „Indeni ano, ka ningeni aantu ajehe aalongua jandje.” Miiituci jokombanda jevi tamu hijva aakuauo nookuume. Omuaa Jesus te tu tala otse aakuauo, nando tu li po aantu aalunde, no te tu hija tu je moshituci shomegulu. Otse tue mu tondo, ihe oje e tu hoole ngashingeji noku tu hoola nokomeho uo. Otse tue mu dimbua ihe oje okue tu dimbulukua. Edina lje nali hambelue!

No pecimbo ljomumvo nguka guongerki Omuaa okue tu icana pamikalo di ili no di ili. Otse tua jono, neiuvo ljetu lje tu pa uusama. Oohapu doka tue di uuvu na doka tue di lesha da tsa da fa oondungu doonane. Otua zi poohapu da Kalunga katu nombili. Inatu shi geela! Enjenjeto ljeiuvo omolu oondjo nehendo ljegongamuele ljooohapu oljo ehijo ljesilohenda lja Kalunga. Oje ta kambadala oku tu cikameka mondjila jetu noku tu hila kuje, opo a uape oku tu tsejicila emanguluko nedimo po ljooondjo adihe omolu oshilonga she. Mpoka pe na shili esilohenda, Kalunga sho te tu penduca otse aanje, noku tu fala mehupico.

Ngele egongamuele lioohapu nomanjenjeto geiuvo kage na oonkondo oku tu cikameka, nena Kalunga ta longica omikalo omikuauo, otse aaiinaji naadigu opo tu ninge je. Pecimbo ljomumvo nguka uo gua piti oje okua longica omikalo odindji da lalakanene uuaaua uetu. Momagumbo ogendji mua kucua aantu moombila odindji da holoka momaendo. Ogumue a juulukua omusamane gue nomukuauo aakuluntu je nomutitatu okanona ke n. s. t. Esiku limue tua aadika kOmuaa momaudigu ngoka no tua popicua kuje nelaka ljuukualuhe. Pamue Kalunga okua koca po onguvo jesiikilo jojendji nokue ja ulukile uulunde muuinaji uauo auhe nesilohenda muuanaua ualjo auhe.


Oshituci shomu Golgata tashi ka shituka noku-ninga oshituci shohango jOnzigna, shoka tashi tameke pecimbo ljaso. Ombushiki oje Kristus Jesus Omuaa guetu nomufuko oje ooitaali ajehe. Ecimbo etoje lja cikana. Uulunde kau po, noluhopo kalu po, neso kali po. Ohango jOnzigna ja aluhe ja tameke. Ondjimbo ompe taji ka uvika ja fa endundumo ljomeja ogendjigendji: Omuaa na hambelue! Amen.

E. Kilpelainen.



## Omundohtora omupe k'Onandjokue.

Otse tua li tu nenjanju enene petameko ljomu-mvo nguka sho tua mono omundohtora omupe e ja mOuambo. Ngashingeji, omumvo nguka manga inagu hula po, tua guedelua po natango enjanju, sho tua mono omundohtora omukauo a tula k'Onandjokue esiku 26 lja Oktober. Naje uo omukiintu ngashi oondohtora mboka je mu tetekele, nedina lje Inkeri Saloheimo.



## UUDIGU UAAKRISTE JOMU KIINA.

Omundohtora guetu omupe Inkeri Saloheimo sho kua kundu egongalo ljokOniipa, okue li hokololele uo uudigu uakriste jomu Kiina nkoka naje uo a kala ko oomvula ndatu nokuli. Ehokololo lje olja guana li tsejike mOuambo ajihe, nonkee tatu li tala uo mpaka:

Ngashingeji pua piti oomvula mbaali oshilongo oshinene shaakiina sho sha lalua kepangelo epe. Epangelo ndjoka oljaakommuniste. No tu shi shi, nkoka ku nepangelo ljaakommuniste, oko aakriste taa mono shili uudigu, oshoka epangelo ndjoka oljopa Antikristus, tashi ti: li nondumbo na Kristus. Shika osha holoka uo ma Kiina.

Omumvogu, petameko lja Desember, iigongi jaa-kriste oji indikua konjala moshilongo ashihe shaakiina. Ngele omalongelokalunga gomoongerki nenge omambo gomomagumbo, agehe itaga pitikua ue. Omukiina ngele ta aadika ta lesa Ombimbeli, shika osha guana oku mu etela oshiponga. Aakriste ojendji ja li je nokukala nokuli moondolongo omolu eitaalo lja-uo.

Aatumua aakuilongo konjala ajehe ja li je nokuza mo moshilongo shaakiina. Mboka je li po natango, otaa tegelele uo ompito ja uape okuza mo. Ojendji ja pangua eendacano alihe naakriste aakiina. Aahongi itaa pitikua okuza po pongulu, naakriste aakiina itaa pitikua okuja ko ja kundacane. Ja fa je li moondolongo, na jamue omo ja kala mo shili.

Ehanganotumo ljetu olja li lja tumu ko uo aatumua aasuomi, ihe ngashingeji omuhongi gumue auike a cigala ko, oojakuauo sho ja shuna ku Suomi. Omuhongi ngoka, edina lje P. Parviainen, ota ziminua natango a talelue po kaakriste aakiina no ta valu nokuli okulandica, po Ombimbeli domoshikiina. Ihe kehe ngoka te ja oku mu talela po, oku nokugandja edina lje li njolelue membo, opo li tsejicilue aapolisi. Naantu ja tja ngaaka mboka ja tsejika taa talele po omuhongi, otaa talua aalimbilua jomoshilongo.

Otaku pulua shili omukumo nohoole nuudiginini omuntu a uape okudiginina eitaalo lje mu Kiina jomashingeji. Ihe natango ope na ngaa mboka taa diginine okulesha Ombimbeli no inaa idimbika Omukulili guauo. Kalunga ngoka e ja ucile ecimbo ljuudigu u cike mpoka, oje ta kala uo pamue najo no te ja koleke.

Moohapu da Kalunga omu netumbulo tali ti: „Omuntu kehe na vulike kaapangeli mboka haje mu pangele. Oshoka epangelo alihe oljomu Ka-

lunga; aapangeli mboka je li po, oje ja tulua po ku Kalunga.” (Rom. 12: 1) Otashi tu kumica shili, sho Kalunga ta zimine pu kale epangelo eumaji li nondumbo naje. Ihe osho tuu shoka sha holoka nokuli o-luindji mokukala kucngerki ja Kristus. Aakriste oje nokuninga ano shike, ngele ju uete ehalo ljepangelo oli na nanaa ondumbo nehala lja Kalunga? Na mpc-ka otu na ejamukulo li-li mOmbimbeli jetu. Aajapostoli sho ja falua kaapangeli aajuda no ja kumagidua jaa uvice ne edina lja Jesus, oja jamukula no ja ti: „Okuvulika ku Kalunga ku vule okuvulika kaantu.” (Iil. 5:29)

Otse katu shiuo ecimbo li cike peni tse tatu pitikua tu gongalele oohapu da Kalunga. Tu diginineni ano, manga tu di na. Tu konakone naua oohapu da Kalunga noku di ilonga, opo ngele tatu kucua omambo getu, tu kale tu noohapu da Kalunga moomoenjo detu.

Katu shiuo ecimbo li cike peni tatu pitikua okuhokolola edina lja Kristus. Tu endeleleni ano ngashingeji okucikica elaka ljevangeli ku ajehe mboka tatu ja aada. Ecimbo oljo efupi.

Otu na uo ekuaco limue enene tatu vulu okukuaca aamuameme aakiina naljo. Oljo egalikano. Ando tu hangane shili oku ja galikanena ja uape okudiginina Kristus, oshoka oje omusindani, na mboka je otaa sindi uo pamue naje. Jesus ota ti:

„Muujuni omu li mo mu nuudigu; ihe, ikoleleleni, ongame nda sinda uujuni.” (Joh. 16: 33)

## MEONGALO LOMOMUND AUNGILO.

Omuhongi Erkki Hynonen novajakuli vaje va enda mo ngaha: Efiku eti 10. 9. 51 oandaha jongulosi ja ningua komufita A. Kantalelo. „Efeni ounona ve uje kuame”, moluasi ounona ovo va hangua po va teelega ovahongi: ovakuluntu va ka nangala. Omusamane E. Hynonen a lesa jo etumbulo eli: „Kalunga ta dulu okuedela po”, poandaha jongula.

Eti 11. 9. momukunda Epasa mua ningua jo omaudifo. „Ava e va hole ohe va denge.” Ovapasa va fatululilua ntumbi Kalunga omutekuli, ha tekula ta denge.

Omufita uokEenana Josua Hanjango a popja joo eendjovo edi: „Ouhamba oua femona la holekua.” Emona la Kalunga olo osiholekua.

Efiku olo tuu olo, otua ninga ohungi mOsipala. Omufita Josua Hanjango a popja etumbulo eli: „Omuenjo ohau longo mohonde.”

Omufita Omusamane V. Kaulinge a tonga eendjovo edi: „Ame onde mu pa osivelo sa jeululua ndele kape na ou ta idile po.” -Ovantu vahapu ava tava vele va peua omiiti. - Ongula esi kua sa momukunda ou omua dja ovantu 5 ve uja koskola.

Eti 12. 9. 51 ohungi ja ningua mOhauuanga.

Omufita Josua Hanjango a tonga eendjovo edi: „Omuenjo ua aluse ouo okusiiva Kalunga, na ou ue mu tuma Jesus Kristus.” Paulus esi a siiva Jesus, oini-ma aise ja ninga oimbodi.

Omuhongi Hynonen esi a mana okuhakula ovantu, okua pula epulo eli: „Esaso tali tu pe sike? (1) Otali pe edimo lomatimba. (2) Otali kulile mefjo. (3) Tali jandje omuenjo ualuse.

Omufita V. Kaulinge a tonga etumbulo eli: „Tala ohandi uja diva.” Okua pula ongudu ngenge iudite tu elaka eli.

Omufita A. Kantalelo a tonga eendjovo edi: „Ota-va udu ngahelipi ngenge itaku tumua omuudifi?”

Efiku 15. 9. 51 mOlupale omuhongi Hynonen a lesa eendjovo Ef. 3:14-19, ndele a diinina unene edi tadi ti: „Kalunga e mu pe eenkono okusiiva oule uohote ja Kalunga.”

Omufita Josua a lesa eimbilo 39 mEhangano. Okua hepaulula ntumbi Kalunga a endifa muene uomukunda ou fijo omomafiku aa esi e mu fikifa keli-dilululo.

Eti 16. 9. 51 omambo mOsisogolo. Ovantu va li po 55. Tete ovantu va hakulua, opo ne taku sikula esaso lokaana. Daniel Ngifikua a tonga eendjovo edi: „Ifane nge efiku loudju uoje, ame ohai ku kuafa, nde to fimaneke nge.”

Omufita Omusamane V. Kaulinge a lesa eendjovo edi: Heb. 1:13-20. Okua lombuela ovantu ava ve li mofuka va kale nelinekelo okulinekelo Kalunga. Ve si



teelele mompepo jelinekelo, va mone meitavelo omukumo nokutja novakuankala vahapu ava ve li momuti omu otava ka ninga ovakriste.

Omuhongi Ukko Karhunen a jelekela ovantu Jesus nevela eli hava kufa nalo omeva meendungu davo. Evela olp ola pandekua kongodi, ndele ongodi ojo ohai tokoka fiku limue. Jesus ita tokoka, okua pama.

Omuhongi E. Hynonen a ti: „Ehalo la Kalunga ole li ovantu avese va hupifue.” Nje ovakuankala, Kalunga a hala mu hupifue, esi a eta ovakriste va dike omaumbo meefuka deni omu. Ningeni omatui mu tambule evangeli, olo li mu etele oukumue uejakulafano.

Eti 18. 9. 51 omufita V. Kaulinge a lesa eendjovo 2 Kor. 5:6-10. Ompepo jomu Kalunga, ojo ompepo jouladi, osesi ojo tai tuala kefikilo.

Omufita Josua a ti: „Ou e li mu Kristus oje omusitua mupe.” Omusitua mupe oje ta ka fjuulula ouhamba ua Kalunga.

Omuhongi E. Hynonen a ti: „Onje ombrive ja Kristus. Hano kokutja omukriste ota lesa ehupifo, ta lesa eenkono da Kalunga odo di li muje.

21. 9. 51 Omundaungilo: Evangeliste A. Kandjibi a ti: „Ou ta eulule nge osivilo, okuje handi uja” - „Kristus akata e nomuenjo muame. Ou e nomuenjo mu Kristus oje aeke ta mono oupu oukriste.” (Josua Hanjango.)

Omuhongi E. Hynonen a lesa Ef. 2:13-14 no a popja Jesus nokutja oje omukuatakanifi munene. Tete a kuatakanifa Kalunga nomuntu. No a kuatafanifa omuntu nomuntu mukua, esi a teja po ekuma pokati komuntu na Kalunga no pokati komuntu nomuntu mukua.

Omufita V. Kaulinge a lesa Mat. 22:37-39. Okua ti: „Onda njekua ombili esi nda tala Jesus ombinga imue, ha eembinga adise.”

Omuene na nangeke noupuna eendjovo edi da kunua meongalo laje kovajakuli vaje.

Efiku eti 21. 10. 1951 mcongalo lomOmundaungilo mua li osivilo sinene sesaso lovakuluntu. Mongundu jovasasua mua li ovasamane ovakuluntu Ndadi ja Si-jagaja, Hitade ja Neingo na Ndjabeka ja Hangula. Efiku olo kua sasua ovantu 56. Natango vamue tava ka sasua momuedi tau uja. Taleni Omuene esi a longa mofuka momakuti gomousilo nUkuanjama.

Omufita Andreas Kantalelo.

## OUKUATJA UOTETE UOMUNTU — OMUDILO TAU HOLOLA.

Lesu Ps. 51; Joh. 16: 8.

Oufiku ngenge omuntu u li mondjuo mu he na nande okaujelele, otasi ku djupalele nga ua hala okupita mo, no ito mono nokuli ondjila manga inamu jelifua. Efiku limue oto lipumu nande okosipundi ile kusa sontumba.

Huameka u tale olamba ile okalihita, oto ka mona naanaa asise esi si li mondjuo omo. Oujelele ile omundilo ue ku hololela hano esi si li mondjuo omo.

Eendjovo da Kalunga otadi tu longo notadi tu ulikile nokutja omuenjo jetu oi jadi efjo litula li jadi oudijo notali tu li nokuli, noinima aise ja njata noii tai di tuu momuenjo uomuntu.

Oku na osinima simue asike oso tasi ulikile notasi hololele ou unamatimba nkee momuenjo uaje mu li. Oso omuhololi ou munene Ompepo ja Kalunga.

Onkatu jotete jelidilululo nojesitululodalululo lasili, ojo okuhepaulula omatimba nokuefa oilonga ii. Omutima ou inau hololelua no inau ulikililua kOmpepo Ijapuki nkee u li itau lidilulula no itau efa oilonga jauo ii, osesi kau lisii nkee ua tja.

David, omulumentu ou kua li ha diladila aluse Kalunga nompango jaje, okua li e nokutja: „Omuene sivifile nge omanjono ange!” Tetatete tua pumbua okuholelelua nokusivifilua omatimba etu noilonga jetu ii, opo tu dule okulidilulula noku ji efa; fje tu jadi-fue nOmpepo jaje Ijapuki.

Omukuetu omuholike. Omutima uoje oue u jeululile tuu Ompepo Ijapuki? Oua konekele tuu nee oilonga joje ja njata noui uoje ause? Nganga hano ku si muene nande efiku limue, indila sili Omuene

Kalunga je muene e ku jeululile omutima uoje, opo Ompepo jaje i uje muove jo i ku sivifile kutja okukala kuo e noilonga joje ojo ojii kosipala sa Kalunga. Opo u he litalaleke ove muene nou tje vati pokati keni na Kalunga kape nombudi, manga ino ulikilua sili kOmpepo Ijapuki jovene ombili pokati keni nOmueene Kalunga.

(Elundululo ku S. Sikongo.)

## EPUTUDO LJAANONA OLI LI MIIKAHA JA HENA JINA.

Aalumentu jaali ja kuutumba, gumue okua pula omukuaou ngoka a li nomuana ta tsakanica mbala oomvula omulongo, ahala okuuva omagano ogashike ta pe omuana metsakanico ljoomvula omulongo. Okua jamukula: „Tala, mondjato jandje mu omu na oshunjolu nde shi nola ohela, taamba u leshe mo shoka tandi ke mu pa.”

Nguka a taamba nokua leshe mo ngeji: „Okua tuu kesiku ndika ljonena sigo okoomvula doka tadi landula, onde ku uvanekete omumuandje mesiku kehe ndi kale ndi notundi jimue okukala nangoje, ecimbo ndjoka ndi li manene mu ngoje. Otandi ku uvanekete ecimbo ndika otali kala ljoje, ha ljasha shilue. Kaku kala nando sha shomiinakuguanicua jandje shi juge ndje ando ecimbo ndi ljoje.”

Pecimbo ljetu opu na tuu oohe mbo taa gandja kojana omagano ecimbo ljokupukulula omuana, mii-nima ojindji a pumbua ekuaco lje. Otseni atuheni otu shi shi, aainekelua jotango jomunona kombanda jevi ojo tuu he na jina. Ohapu kehe taji zi mokana kahe no ka jina omuana guauo te ji taamba ojo ohapu joondunge nando ngiika omashendjo gouala. Oshilonga kehe sha longua ku he no ku jina omunona te shi tala osho oshilongankondo kashi vulika nando ku gulue. Epulo kehe e ii pula he na jina no lja jamukulua, ota tala olja jamulikikika. Ando omunandunge gulue e li jamukule e vule he nenge jina iti inekelua ngashi ti inekete omaja...ukulo ga he na jina.

Omunandunge Salomo ta ti: „Putuda omumuoje pampumbue jondjila je, opo kaa ka ze mo no nge a koko.” Oond. 22:6. „Ilandela ecimbo oshoka omasiku omiinaji.” Efes. 5:16. „Ja putudileni mevuliko nometilo ljOmuaa.” Ef. 6:4.

Konima jomasiku ga piti onda leshe moshifo shoonkundana domagongalo omakualuther mu Union, moka omusita gumue anjola: „Jajee tse asita naalongi tatu mana ecimbo ljetu alihe naanona joojakuetu tatu ja pukulula, ihe tua fa tuua na nando ecimbo noomuenjo daana jetu. Tua humica aana joojakuetu komeho manga jetu jene inatu ja fala nando mouino ja fa udjo tue ji fala maalongua jetu. „Ilandela ecimbo oshoka omasiku omauinaji.” Tashi ti: ikongela ecimbo ljokukala nomumuoje mu kundacane: —

1. Jesus omuholike nke ta taamba aalunde. Onaua omumuoje no ngele ta vulu okujamukula nge a koko epulo ndi: „Oua taamba Jesus pecimbo lini moku-kalamuenjo kuoje?” - „Onde mu taamba manga nda li mekolo lja tate na meme megumbo ljauo, egumbo ljooitaali shili.”

2. Oohapu da Kalunga odo oshijakulico shesilohenda. Kuna momuenjo oohapu da Kalunga manga satana ina kuna mo omauge. Onaua omumuoje ta vulu okudimbulula oshinima shika: oandaha jongula no jongulohi ojo ja simana shili maandjetu mpo meme na tate tua imbi noomuenjo tadi galikana, tse tu li mekolo ljauo. Embo li vule omambo agehe Ombibeli tali siikululua tu oohapu domuenjo. Otu uvite oshihomo shomauaua gaajengeli komitse detu, nge tatu galikana.

3. Egalikano. Galikana naamuoje muuike. Ngele ua adikilila komumuoje to galikana, ino za po, tsikila nando te ja te ende kee shi opo a ka vule okutja: Otandi dimbulukua efano limue lja tate nenge ija meme no itandi li dimbua oljo ndjo sho nde mu ada a tsoongolo ta galikana. Onda hala okuholela eitaalo ljaakuluntu jandje.

Ngele itatu jambuka tu putudile aana jetu mevuliko nometilo ljOmuaa manga tu necimbo, satana ote ja kuca po siehe, ihe otaku ja ecimbo Omuaa te je tu pula. „Olje ta vulu okukala po?” Omunelago oje ngoka ta ciki koshipala sha Kalunga kesilohenda ta ti: „Omuaa, tala ongame ngu nuunona mbu ue u pe ndje!”



Oseminari jaakadona mOngandjera tai taamba aalongua aape esiku 28 lja Januarie 1952, o undi onti 7 ongula. Oombapila dekonzo odi nokucika kOngandjera manga esiku eti 15 lja Jan. inali cikana, oda dika:

- 1) Ombapila jegongalo (omukongi e nokuadika a guanica oomvula 18)
- 2) Epopilo ljofoilaini, omulongi guokagumbo moka a piti
- 3) Enjolululo ljonzapo jokagumbo
- 4) Ehokololo ljomukadona muene.

Omukadona kehe oku nokuisila oshimpuju kombinga jilja, a konzele oseminari iilja oclia 3 (ndatu) momumvo, iilja mboka te ji futua. Oata jimue oku noku ji eta moshikako shotango, onkuauo mbali manga oshikako oshitijaali inashi hula.

Omukuluntu guoseminari.  
Ongandjera.

### OONKUNDANA D'OTJIWARONGO.

Aakriste aakuetu ne aaevangeli pa Luther aauambo, otandi mu talele po noku mu hokololela mbi:—

Egongalo ndika ljoTjiwarongo okua li li na oshituci shelangeko ljaaevangeliiste jaali, mboka ja zi mO-uambo, ja tumua komukuluntutumua V. Alho. Ano esiku tuu ndjoka, omuhongi omuduisi guedina ndi W. Loeber, nomuhongi omburu C. A. Gagiano, naakuluntu jegongalo ljoomburu jatatu, ojo ja cikimeke aaevangeliiste Filemon A. Nashihanga na Werner Amuaalua poaltari. Egongalo olja imbi: „Omuaa kua tumua aatumua je.”

Eimbilo ndi olja imbiua momalaka gatatu gaaluude. Eimbilo sho lja hulu, omuhongi W. Loeber okua galikana moshiherero, no a lesa oohapu di: Luk. 10: 2, nomuhongi Gagiano okue di lesa moshiafrikaans. Aatumua no ja kumagidua ku Ds. Gagiano nohapu di: 2 Tim. 4: 5. Aatumua no ji imbi eimbilo 48l, jo ajeke.

Kesiku eti 11 ljomuedi Maart 1951 megongalo ndika lja Otjiwarongo omua li eshasho ejaipuki neko-leko ljaauambo ja longua kaaevangeliste mboka aape ja Otjiwarongo. Na isheue meti 15 lja Maart tuu ngoka 1951, ongulohi jetine po Imex Myn kua shashelua nokua kolekua aauambo, nUulalelo Uujapuki uOmuaa Jesus Kristus ua peua mboka kua li ja juulukua olutu nombinzi jOmukulili guetu. Konima nkuijaka, aaevangeliiste oja ka uvicile ko evangeli lumue, nolutijaali oja kalele ko oshinike shimue, okukonakona nokujoolola aashashua naakolekua noku ja longekidila omasakramenti omajapuki, ngoka ja jakulua nago komuhongi W. Loeber, nomuhongi Gagiano okua kundu uo aauambo, a ti: „Omukriste ota dimbululua moshipala she.”

Aauambo ajehe mboka ja jakulua ngeji mesiku eti 11 nomesiku eti 15 gomuedi Maart 1951 kOtjiwarongo oje li 35.

Omutumua gueni: Filemon A. Nashihanga.

## OMUKUETU!

NGASHINGEJI ecimbo lja cikana u njolice kaa-jakuli jOMUKUETU, opo u mone oshifo shoje omumvo tagu ja. Ihe mokuinjolice u nokudidilika oshinima shimue. OFUTO JA LUNDULUKA. Omumvo 1952 „Omukuetu” ta pula mOuambo ocilinga jimue nosispencia (ls. 6d.) omumvo aguhe. KUushimba mutambi e nokufuta icilinga iijaali (2s.) omumvo aguhe. Muujuni uongashingeji iinima ajihe ja ningi ji nondilo. Ihe OMUKUETU nando na futue 1/6 nenge 2/- omumvo gumue, natango kashi nondilo. Endeleda ano u imonene oshifo shetu oshinene okuza ku Januari.

Ngele na aadika u injolice nokuli no ua futu ngashika shito, guedela ko natango osispencia, opo u mone oshifo shoje omumvo aguhe.

Oshifo shEHANGENO tashi pula mOuambo omapeni omugoji (9d.) no kUushimba ocilinga jimue (ls.) omumvo 1952 aguhe.

kOmuaa ja ninge aalongi jaanona, otaa tsejicilua ekonakono li li moseminari jokOniipa esiku 28 lja Januarie 1952, potundi onti 7 jongula. Omumati ngoka a hala a taambelue moseminari e nokutumina omuuliki guajo oombapila dika:

1. Ombapila jegongalo.
2. Epopilo ljomusitagongalo.
3. Enjolululo ljonzapo jomoskola jaamati.
4. Epopilo ljomutumua omusuomi.
5. Ehokololo lja njolua noshikaha shomumati je muene, moka ta hokolola naua shoka tashi mu eta moseminari.

Oombapila dika adihe odi nokukala kOniipa manga esiku 15 lja Januarie inali cikana. Ano omumati ite di etelele!

Kehe omuseminari jokOniipa e nokukongela oseminari je oolata 6 domahangu kehe omumvo. Omahangu ngoka ote ga futua, ihe ngele ta adika ine ga mona pehulilo ljoshikako oshitijaali, ota lalekua mo.



OMUHONGI

OLLI SUIKKANEN

okua mana oondjenda de

ku Johannesburg 25. 11. 1951.

### O O M B I R I V E .

Abed Immanuel, Tsumeb, te tu kundu no ta ti: Hambeleleni Omuaa, oje tuu oshili.

Amon Josafat, Luderitzbucht, a hala tu kaleni tu hoolacaneneni ngashi Omuaa Jesus a li e hoole uujuni.

Kristian Josef, Tsumeb, ota ti: Onda djuulukua Omue Tate a pe nge Ompepo ljaipuki meni lange, i teme olampa jange i teme shili.

Joel Namupala, Windhoek, oku uvitile uugundjuka ue oluhodi, oshoka omapukico ogendji muujuni. Ihe Jesus okua sindi uujuni, ongoka e li puje ita pumbua okutila.

Paulus Sihepo, Orangemund, a hala tu hambe'ele Kalunga.

Vilho Kalitu, Keetmanshoop, ota ti: Ou ta piti mosivelo oje omufita ueedi, ou na omukeleli uosivelo ote mu jeulula, needi otadi udu.

Andreas Amukujaja, Walvisbay, oku negalikano, ekuacohenda lja Kalunga li tu siikile, nOmuaa e tu gamene.

G. Gebhard, Orangemund, oku noshimpuju, aagundjuka tu huameke oolampa detu di monike Omuaa guesimano a uape okuja mo, no kuaa kale ngoka ta cigala mondjilakati.

David Seja, Tsumeb, a mono uunkolui nkene tau eta eso.

Natanael Amuaalua, Okahandja, oku noshimpuju tuua vundakanice ukriste nuupagani.

Alfred Shivo, Okahandja, a njanjuka Kalunga sho a egulula iijeelo je nokua tumu aaevangeliiste je kUushimba.

Wenner Ruben, ota kumagida tuua landule aapukici.

Daniel Amunjela, Omaruru, te tu tsomuku. mo tuua vulue okugalikana.

Johannes Hamunanjo, Orangemund, ota pula: Onaini to pampadala ondjila ojo tai tuala momuenjo.

Salomo Saduka, Orangemund, ota diladila ngeno okua li tu neitavelo la sili, ngeno tua efa oikoluifa.